

Na osnovu člana 12. stav 3. Statuta Općine Ilijaš ("Službene novine Kantona Sarajevo", broj 20/09) i člana 17. Odluke o priznanjima Općine Ilijaš broj -----Općinsko vijeće Ilijaš na sjednici održanoj dana 30. 12. 2014. godine, donijelo je

PRAVILNIK
o procedurama i kriterijima za dodjelu priznanja Općine Ilijaš

I – OPĆE ODREDBE

Član 1.

Ovim pravilnikom utvrđuju se procedure i kriteriji za dodjelu priznanja Općine Ilijaš, koja su propisana Statutom Općine Ilijaš i Odlukom o priznanjima Općine Ilijaš.

Član 2.

Javna priznanja i odlikovanja općine Ilijaš su:

1. Povelja o proglašenju počasnim građaninom
2. Plaketa
3. Nagrada – priznanje
4. Pohvala

Član 3.

Javna priznanja iz člana 2. dodjeljuju se po pravilu za Dan Općine Ilijaš radi odavanja priznanja za postignuća i doprinos od posebnog značaja za razvoj i ugled Općine, a naročito za uspjehe u unapređivanju privrede, nauke, kulture, zaštite i unapređivanje okoline, sporta, tehničke kulture, zdravstva i drugih javnih djelatnosti, te za promociju aktivnosti koje su tome usmjerene.

Javna priznanja iz člana 2. ovog pravilnika, mogu se dodijeliti fizičkim osobama i kolektivima sa prebivalištem, odnosno sjedištem na području općine Ilijaš.

Izuzetno od odredbe iz prethodnog stava ovog člana, priznanja se mogu dodijeliti pojedincima i kolektivima koji nemaju prebivalište, odnosno sjedište na području općine Ilijaš.

Član 4.

U jednoj kalendarskoj godini istoj pravnoj i fizičkoj osobi može se dodijeliti samo jedno javno priznanje.

Počasnom građaninu ne dodjeljuju se druga javna priznanja Općine Ilijaš.

Član 5.

Počasnim građaninom Općine Ilijaš može se proglasiti građanin Bosne i Hercegovine ili druge države, koji je svojim radom, naučnim ili političkim djelovanjem značajno doprinio napretku i ugledu Općine Ilijaš, ostvarivanju i razvoju demokratije u Bosni i Hercegovini, mira u svijetu i napretku čovječanstva.

Član 6.

Počasnim građaninom može se proglasiti građanin općine Ilijaš, koji je posebno zaslužan za napredak i promociju ugleda Općine Ilijaš u Bosni i Hercegovini i izvan državnih granica.

Počasnim građaninom Općine Ilijaš izuzetno se može proglasiti i osoba koja nema prebivalište na području općine Ilijaš, a zaslužan je za napredak Općine.

Član 7.

Plaketa Općine Ilijaš je javno priznanje koje se može dodijeliti fizičkim i pravnim osobama za iznimna postignuća i doprinos unapređenju i razvoju Općine Ilijaš u protekloj kalendarskoj godini ili proteklim kalendarskim godinama na području:

- ~ kulture,
- ~ privrede (turizam, ugostiteljstvo i dr.),
- ~ nauke,
- ~ zaštite i unapređivanju okoliša, odgoja i prosvjete,
- ~ zdravstva i socijalne zaštite,
- ~ tehničke kulture,
- ~ sporta i tjelesne kulture,
- ~ i drugih javnih djelatnosti,
- ~ te za promociju aktivnosti koje su tome usmjerene.

Član 8.

Nagrada – Priznanje Općine Ilijaš je javno priznanje koje se može dodijeliti fizičkim i pravnim osobama za svoj dugogodišnji rad na području Općine Ilijaš ili za realizaciju projekata značajnih za razvoj Općine Ilijaš na području:

- ~ kulture,
- ~ privrede (turizam, ugostiteljstvo i dr.),
- ~ nauke,
- ~ zaštite i unapređivanju okoliša, odgoja i prosvjete,
- ~ zdravstva i socijalne zaštite,
- ~ tehničke kulture,
- ~ sporta i tjelesne kulture,
- ~ i drugih javnih djelatnosti,
- ~ te za promociju aktivnosti koje su tome usmjerene.

Član 9.

Pohvala Općine Ilijaš je javno priznanje koje se dodjeljuje fizičkim i pravnim osobama za donacije i slične aktivnosti, za uspješnu saradnju, te za doprinos razvoju i promociju ugleda Općine Ilijaš.

Član 10.

Radi predlaganja kandidata za javna priznanja iz člana 2. tačke 1., 2. i 3. Komisija za javna priznanja, obilježavanje historijskih događaja i ličnosti i zaštitu kulturnog i prirodnog naslijeđa Općinskog vijeća Ilijaš (u daljem tekstu: Komisija) upućuje poziv subjektima iz člana 15. ove odluke, najkasnije dva mjeseca prije dodjele priznanja.

Rok za podnošenje prijedloga ne može biti kraći od 15 dana od dana raspisivanja poziva preko lokalnih sredstava javnog informisanja i općinske web stranice. Poziv sadrži uvjete za dodjelu i rok za podnošenje prijedloga za dodjelu javnih priznanja.

Član 11.

Prijedlog za dodjelu javnih priznanja iz člana 2. tačke 1., 2. i 3. mogu dati:

- ~ pravna lica sa sjedištem na području općine Ilijaš (privredna društva, političke stranke, mjesne zajednice, udruženja građana, ustanove i drugi organi i organizacije),
 - ~ građani sa prebivalištem na području općine Ilijaš.
- Prijedlog se podnosi Komisiji u pisanom obliku.

Član 12.

Prijedlog iz člana 15. ove odluke sadrži:

- ~ podatke o podnosiocu prijedloga,
- ~ obrazloženje postignuća i doprinosa zbog kojih se daje prijedlog za kandidata za dodjelu javnog priznanja Općine Ilijaš uz odgovarajuću dokumentaciju,
- ~ biografiju za fizičke osobe i podatke o poslovanju za pravnu osobu,
- ~ vrstu javnog priznanja za koje se osoba predlaže.

Na zahtjev Komisije podnositelj prijedloga dužan je dostaviti i dodatne podatke i dokumentaciju. Komisija može, uz saglasnost podnosioca prijedloga, promijeniti vrstu javnog priznanja za koje se kandidat predlaže, te općinskom načelniku dati prijedlog za dodjelu Pohvale Općine Ilijaš. Komisija može, uz saglasnost podnosioca prijedloga, odrediti područje iz kojeg se kandidatu predlaže dodijeliti priznanje.

Član 13.

Komisija razmatra prijedloge za dodjelu javnih priznanja Općine Ilijaš dostavljene u roku, te izrađuje pisani izvještaj o svom radu i mišljenje s obrazloženjem o pojedinačnim prijedlozima i dostavlja ga Općinskom vijeću Ilijaš.

Član 14.

Općinsko vijeće Ilijaš, na temelju izvještaja Komisije iz prethodnog člana, donosi odluku o dodjeli javnog priznanja.

Član 15.

Na temelju odluke o dodjeli javnih priznanja predsjedavajući Općinskog vijeća Ilijaš na svečanoj sjednici povodom Dana Općine uručuje javna priznanja Općine Ilijaš za prethodnu kalendarsku godinu.

Izuzetno od odredbe prethodnog stava, u izbornoj godini javna priznanja može uručiti općinski načelnik na svečanom prijemu povodom Dana Općine.

Član 16.

Odluku o dodjeli Pohvale Općine Ilijaš donosi općinski načelnik i uručuje Pohvalu.

Osim povodom Dana Općine, Pohvala se može dodijeliti u ostalim svečanim i protokolarnim prilikama.

Član 17.

Javna priznanja Općine Ilijaš koja se dodjeljuju grupi fizičkih osoba, ako je ostvarenje, odnosno doprinos koji se nagrađuje, rezultat njihovog zajedničkog rada, sastoji se od pojedinačnog priznanja za svaku fizičku osobu.

Član 18.

Danom stupanja na snagu ovog pravilnika prestaje da važi Pravilnik o procedurama, kriterijima i mjerilima za dodjelu priznanja ("Službene novine Kantona Sarajevo", broj 35/10)

Član 19.

Ovaj pravilnik stupa na snagu danom objavljivanja u "Službenim novinama Kantona Sarajevo".